



UPA 2017/167
Nuuk, 15.05.2017
Kelly Berthelsen

Suliniut MANU-p ineriartorteqqinneratut isigineqarsinnaasumik nuna tamakkerlugu angajoqqaanut atuarfimmik pilersitseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Angajoqqaanut atuarfik aallartinneqassaaq 1. juuli 2018-mi.

(Inatsisartunut ilaasortaq Nivi Olsen, Demokraatit)

Inuit Ataqatigiinniit Nivi Olsenip Demokraatineersup siunnersuutaa ima oqaaseqarfigiumavarput.

Inuiaqatigiit kinguaariit marlussuinnaat matuma siorna tikillugu amerlaarsuullutik ilinniarfigeqatigiillutik inuusimasut maanna inoqutigiiinguakkuutaarlutik, aallaammi amerlaqisut angajoqqaatut kisermaajullutik inuulersimapput. Tassa ilinniarfigeqatigiittarsimagaluarnertik anaasimavaat ajoraluartumillu ileqqussanik ilisimasassanillu allanik iluatinnartunik ilinniarfigeqatigiittarnertik taamaalillutik annaaneqarsimavaat.

Sulilu tamanna qalliinarlugu ullumikkut naammaginakannersumik isertitaqarluni inuuniaraanni ulloq naallugu sulineq pisariaqalersimavoq taamalu angajoqqaat qitornallu attaveqatigiittarnertat taamalu meeqqat inersimasunit ileqqussanik ilinniartinneqarnerat aamma killeqalersimalluni.

Ajoraluartumillu inuit ilarpassuinit imigassaq aamma naalliutsitsisarpoq. Aalakoorneq piffissamik qitornamut atugassaralumik annertoqisumik tiguisarpoq taamalu ilinniartitsinissaramik killiliisarluni. Ingakkujorlu aamma aalakoorneq ileqqorluuterpassuarnik nassataqarluni maligassiuinerlunnermik nassataqartarpoq.

Pissutsit tamakku alianartut pissutigalugit angajoqqaanngortorpassuit massakut ileqqussanik amigartumik ilinniartinneqarsimanerat nassuerutigisariaqarput. Inuiaqatigiittut atukkatigut nammaqatigiiffiusutut inuit ataasiakkaat sapersalerfiisigut ikiuuttariaqarpugut. Inuiattullu namminersulerumasutut nukissat tamarluinnaasa pisariaqartikkatsigit siunertat nukit-torsaqatigiiffiusut tamaasa Inuit Ataqatigiinniit tapersorsorpavut.

Taamaammat siunnersuuteqartup siunertaa tapersorsorluinnarparput Naalakkersuisullu akissuteqaatiminni siunertaq taanna anguniarlugu iliuseqalereersimallutik oqaatigisaat nunaannarutigilluinnarparput. Neriuppugut siunnersuuteqartup Naalakkersuisut qanoq iliuseqalereersimanerat paasilluarlugu Naalakkersuisunut isummersueqataalluassasoq tassami siunnersuut iluatinnaqimmat.

Siunnersuut paasilluarlugu aammalu siunnersuummi pineqartutut Naalakkersuisut suliniuteqalereersimanerminnik oqaatigisaat isumaqatigalugu siunnersuutip taama isikkoqarluni itigartinneqarnissaa kaammattuutigissavarput.